



UNIVERSITÄTS-
BIBLIOTHEK
PADERBORN

Universitätsbibliothek Paderborn

**Martini Martinii Tridentini E Societate Jesu Sinicae
Historiae Decas Prima**

Martini, Martino

Monachii, 1658

Decimusseptimus Imperator Kieus. Imperavit annis LII.

urn:nbn:de:hbz:466:1-11848

DECIMUSSEPTIMUS IMPERATOR
KIEU S.

Imperavit annis LII.

*Cyclo 15. anno
40. ante Chri-
stum 1818.*

*Robur corpo-
rum.*

Habuerunt Sinæ in KIEO Neronem suum tot seculis antè, quām Roma suum execraretur; aut siquod aliud monstrum ulla gens aluit. Hinc Sinæ si hominem omnino perditum vivis coloribus volunt describere, KIEUM appellant. Corporis robur in eo rārum fuit; animi non item. Ajunt eum facili nisu densum funem rupisse, hamūmque ferreum trium digitorum crassitie, utraque manu arreptum in rectum extendisse. Uxor ei erat VIHIA nomine, à quā ad omne scelus flectebatur. Insaniens ejus amore, offensāmque veritus, omnia illius arbitrio facere. Cujus rei non ignara VIHIA, quidquid libido aut superbia dictabat, à KIEO amantium jure quasi pro imperio exigebat. Nec iste cunctantior in annuendo, quām illa in pētendo fuit, unius mulierculæ amoris omnia totius imperij commoda postponens. Hinc perpetuis tributis exhaustæ populi universi opes; hinc aurata palatia, sumtuosa theatra & stagna marmoreo ambitu fossisque clausa impendebantur ejus libidini. Memorabilis imprimis fuit ille luxus & inauditum in eum diem voluptatis genus, cùm ingens terræ spatiū in stagni modum excavatum naviūmque capax jussere vino impleri; cuius in ripa tria hominum millia per circuitum prono ore canum instar procumbentium ē lacu ad satietatem & vertiginem usque se ingurgitarunt. Ita poti ad silvam proximam, quam Carneam dixere, titubarunt ut vino jam madidi epulis quoque se infercirent. Ex ejus enim nemoris arboribus quotidie boves, apri, cervi, aliaque id genus animalia jam assata pendebat eorum gulæ parata, qui ē lacu bibissent. Alterum spectaculum longè nocentius excogitārunt, palatio, quod secretum vocabatur, in eam rem magnifice exstructo, ut ex utroque sexu juvenes formā præstantes undique conquisihi, veste & pudore posito nudi promiscue habitarent, cuius foedissimæ consuetudinis arbitri & laudatores regij conjuges alienā voluptate se oblectabant. Nec magis impudica, quām crudelis hæc mulier humanas carnes in delicijs habebat; quas, & maximè siccas ossium medullas nescio

nescio quā arte medicatas ad acuendam suam & Imperatoris libidinem adhibebat. Hæc VIHIA KIEO in manum ita convenerat. Regulus quidam antehac rebellis simulatè criminis veniam petijt, veteres tamen inimicitias adhuc animosè exerceens. Sed ut ad Imperatoris clementiam molliret aditum sibi; VIHIA MAM præstantissimæ tunc formæ puellam obtulit ei per speciem obsequij, non dubitans hac unâ procaci puellâ majorem se cladem KIEI rebus quâm toto exercitu illaturum. Nec eum opinio fecellit. Nam VIHIA in causâ fuit, ut Imperator ejus artibus eversus, post etiam regnum amitteret, non suo tantum, sed totius HIA & familiæ interitu. Et adhuc miser intestinum hostem, ut suas delicias fovebat, ad omnes cohortantium voces præterquam ad Sirenis hujus perniciosæ cantilenam surdus. Tantam tyrannidem exercet femina semel viri potens.

*Mala feminæ
quovis hoste
nocentier.*

Ergo reguli licentiâ Imperatoris offensi, passim deficiunt; &, quod antehac regibus nondum ad omnia scelera prolapso factitârant, spredo jam tum illorum imperio, queis virtutem, ut regiæ dominatioñis tesseram, deesse videbant, in hoc omnibus vitijs oppleto longè liberiùs ausi sunt. Neque jam odia tantum Imperator, sed & arma omnium in se converterat, si Præfectos aliósque magistratus excipiat. Haud enim defuere, qui boni publici & Imperatoris amantes, leniora priùs remedia malo adhibenda censerent. It varijs rationibus & quodam commonendi artificio studuerunt KIEUM ad regni & sui adeò curam excitare. Sed ubi nihil profectum, QUALUNGUS inter purpuratorum præcipuos animo sumpto intrepide in illum ita detonuit.

*Libertas ma-
gistratum in
sinu.*

Meminisse te oportet, Imperator præcipuum decus modestiam esse, quâ preditus pro cuiusque conditione tuis honorem & charitatem exhibeas. Non secus in cives pius, quâm pater in filios; & fide tam integrâ, quâm vicissim ab ijsdem exigie. Principis enim boni est, suis reclè vivendi legem non tantum dare, sed esse, si solidâ pace velit cum sibi subiectu frui. Tu vero penitus horum obtitus, homines tibi commissos pecudum instar non ut pastor gubernas; sed, ut latro fortunis omnibus expoliatos, etiam vitâ privas. Cave, ne serò te facti pœnitentia! postquam, ut cives nefarie occisos ad vitam reducere non potes; ita nec superstites à te alienatos est in manu tua revocare ad obsequium. Quare te hortor atque oro, ut rebus nondum planè desferatis mature ad frugem & Imperatoris officium redeas. Incensus hac oratione Imperator, & in hoc etiam degener à virtute majorum, qui veri adhuc patientes in illâ rerum inclinatione fuere.

H 2

QUA...

Qua lungum occidi è vestigio, se præsente, jubet. Tanti sæpe stetit apud principes à vero alienos loquendi libertas. Ea cædes TANGUM regulum è nobilissimâ HOANGTI familiâ superstitem graviter affecit; maximè verò cùm audisset, inhumatum absque lamentis solemnibus sepulturæ expertem, quæ ambo apud Sinas summæ infelicitatis loco habentur. Is igitur homines certos constituit, qui cadavere sepulturæ decenter mandato, defuncti manibus ritu luctuque patrio parentarent. Ob id obsequium Imperator, quem ea res latere non potuit. TANGO graviter iratus, eum comprehendi tradique carceri mandavit. Quem tamen paullò post libertate donatum ditioni suæ restituit, postquam nemo alius eum suorum scelerum admonuit.

Modus idoneus admonendi Imperatorem.

Subinde cùm Imperator excusâ bene consulentium importunitate, in pejus quotidie rueret, proceres omnes tantæ fæditatis ad extremum impatiens, quotquot aderant, simul Imperatorem adeunt, eoque tabulam offerunt omnia ejus facinora graphicè continentem. Tum lacrimis perfusi rogant, ut tandem injustis cædibus ac rapinis modum ponat. At is ut erat à flagitijs ferox & superbus, contentâ iterum hortatorum oratione, deteriora præteritis moliebatur, præcipuos magistratus, queis ob fidem tam constantem anima omnia debebat, ut factionis capita insectans. Quæ res illi postremò exitium attulit. Nam proceres indignati se suaque consilia ludibrio esse, omnes simul in ejus interitum conjurant, atque ut tyrannum regio nomine & fastigio indignum cum ignominia imperio deturbant, advocate in auxilium TANGO laudatae virtutis regulo, quem suprà diximus QUALUNGI ob admonendi libertatem occisi funus curâs. Eum jubent in KIEUM arma sumere, eoque devicto belli jure imperium sibi vindicare. At negat TANGUS hoc sibi jus esse, si KIEUS facti pœnitens spem de se frugis exinde melioris faciat; nec aliter arma se, nisi ut agrotanti necessariam medicinam capturum. Eo consilio exercitum conscribit, omnibus ad id audendum animos & vires addentibus. In eo discrimine KIEUS plus animi, quam auxiliij aut fortunæ habuit. Etsi enim & ipse copias undique ad defendendum bellum contrahere nitebatur; raros tamen è toto imperio milites collegit, plerisque castra illius ut virtuti & publico bono inimica detestantibus. Defertus igitur à suis, externo præsidio res suas domi penè collapsas fulcire parat, Tartaris ad opem sibi ferendam excitis ingentia præmia militiæ pollicitus, si aduersus cives, ut ipse ajebat, rebeiles tempeltivè succur-

succurrerent. Sed & Tartari negarunt malo Imperatori se militaturos. Usque adeò vel inter barbaros est odio nequitia. Itaque KIEU S jam ab omnibus desertus, ubi res suas ita in angusto videt; tantisper pœnitentiam simulat, TANGUM quæsitis verbis, uti vitam sibi condonet, obtestans. Qui ea specie resipiscens motus, non modò longioris vitæ gratiam fecit; sed plus etiam, quæ sperare audebat supplex, hoc est, imperium restituit. Ipse ut rebus ex animi sententiâ confectis curaque belli depositâ domum redijt; raro moderati animi exemplo. Sed & KIEU S simul ad imperium, simul ad ingenium redijt. Mox enim cum recollectis nescio unde viribus, TANGUM velut perduellem lacepsit armis. Jamque in conspectu erat uterque exercitus; cum primo statim congressu KIEU S à suis deseritur, qui abjectis armis omnes TANGUM ut Imperatorem amplectuntur. Is KIEU M fujientem eoque insequitur, dum extra fines regni Sinensis ejectum cogit in exilio vitæ reliquum exigere. Illuc mortuus, ignobilis exitu secum tot sclera sepelijt, unaque stirpem suam; quæ prima regnare post ejus exilium in Sinis desijt, à vino & venere exstincta. Dignum est observatu, Scriptores Sinicos KIEU M nunquam Imperatoris nomine dignari; sed quoties illius mentio recurrit, latronem vocatare. Nec sine causâ. Quid enim non latronis ha-beat, quem insontum civium crux impavit?

Kieu in exilio moritur.



H 3

MAR-